

Komisaun C aprova proposta Lei Enkuadramentu Orsamentál iha especialidade

DILI, 18 agostu 2021 (TATOLI—Komisaun C ne'ebé trata asuntu Finansa Públika aprova ona proposta Lei Enkuadramentu Orsamentál iha especialidade.

Prezidente Komisaun C, Deputadu Maria Angélica Rangel, haktuir proposta-lei ne'e termina ona debate especialidade iha semana kotuk ne'ebé hala'ó iha Suku Tibar, Postu Administrativu Bazartete, Munisípiu Liquiça.

Nia dehan, iha debate especialidade ne'e partidu opozisaun fó kontribuisaun maka'as no vota a-favór iha artigu balun maibé sira husu rekursu ba plenária hamutuk artigu 11. Parte bankada Governu husu rekursu ba artigu ida (1) mak tenke iha konsensu iha plenária.

“Ne'ebé debate especialidade ne'e ami termina ona no oras ne'e iha prosesu atu finaliza ami-nia relatóriu no paresér atu submete ba Prezidente Parlamentu Nasionál no Prezidente Parlamentu Nasionál mak iha kompeténsia halo ajendamentu hodi debate iha finál globál,” Prezidente Komisaun C, Deputada Maria Angélica Rangel, informa ba jornalista sira, iha resintu uma fukun, quarta ne'e.

Proposta Governu nian apresenta ba Parlamentu Nasionál ho artigu hamutuk 116 maibé diskusaun especialidade iha aditamentu, alterasaun no sai fali artigu hamutuk 126 iha Lei Enkuadramentu Orsamentu Jerál Estadu no Jestaun Finanseira Públika ne'e, bainhira proposta-lei foun ne'e sai ba Lei sei revoga Lei número 13/2009 kona-ba Lei Orsamentu no Jes-taun Finanseira (LOGF-sigla portugés).

Nia fundamenta, tempu to'ó ona hadi'a tanba LOGF eziste dezde 2013 entaun tenke muda lei ne'e tanba liu ona dékada ida.

Alterasaun substansiál ne'e, nia dehan, importante tebes atubele hatán ba limitasaun sira iha lei vijénsia.

Lejizlasaun esensiál ne'e sai nu'udar fasilitadór ba jestaun finanseira no labele sai fali obstakúlu ba dezvoltamentu funsaun Estadu nian, tanba ne'e importante atu hakat-liu limi-tasaun sira-ne'ebé impede Estadu atu ezekuta orsamentu Estadu kada tinan.

Prezidente Komisaun C ne'e fó-sai katak, alterasaun ba kadru jurídiku Orsamentu Jerál Estadu nian no jestaun finansa públika sai nu'udar oportunidade atu inkorpora prátika internasionál sira-ne'ebé di'akliu kona-ba orsamentasaun no transparénsia.

Nia hateten, sesaun plenária ba diskusaun no votasaun iha finál globál ba proposta-lei ne'e possibilidade sei realiza iha fulan-setembru bainhira PN retoma resesu.

Jornalista : Evaristo Soares Martins Editor : Cancio Ximenes

Timor-Leste Ministry of Finance

Governu no PN konklui Diskusaun Especialidade Proposta Lei Enkuadramentu Orsamentu Jerál Estadu no Jestaun Finanseira Públika



Díli, 17 agostu 2021 – Ekipa Ministériu Finansas ne'ebé lidera husi Sua Exelénsia Vise-Ministra Finansas, Dra. Sara Lobo Brites hamutuk ho Komisaun C ne'ebé trata asuntu Finansas Públikas no Komisaun D, Parlamentu Nasionál (PN) ne'ebé trata asuntu Ekonomia no Dezenvolvimentu, konklui ona sesaun diskusaun especialidade Proposta Lei Enkuadramentu Orsamentu (LEO) Jerál Estadu no Jestaun Finanseira Públika, iha lora Sesta-feira, 13 agostu 2021 ho aprovasaun ba Artigu sira hamutuk 125.

Proposta LEO marka pasu importante ida husi kontinuasaun ba implementasaun programa Reforma iha Jestaun Finanseira Públika ne'ebé Governu Konstitusionál Dualuk fó atensaun no hakarak alkansa durante Governasaun.



Proposta LEO ne'e sei substitui Lei Orsamentu Jestaun Finanseira (LOJF) atuál ne'ebé iha ona vijênsia liu dékada ida nia laran. Alterasaun hirak ne'e importante no urjente atu hatán ba limitasaun sira iha LOJF atuál. Ne'eduni haré ba proposta LEO ninia volume no alterasaun substansiál sira iha aspeitu esensiál balun husi kadru orsamentál no jestaun finansas públikas, maka rekomenda aprovasaun ba Diploma foun ida hodi revoga tiha Lei n.º 13/2009 (LOJF), loron 21, fulan-Outubru.

Razaun fundamentál seluk mak lejislasaun ida esensialmente tenke sai hanesan fasilidadór ba jestaun finanseira no la'ós hanesan obstáklu ba dezvoltamentu funsaun Estadu nian, tanba ne'e urjente atu ultrapasa limitasaun sira ne'ebé impede Estadu atu ezejuta orsamentu Estadu tomak.

Alterasaun kadru jurídiku Orsamentu Jerál Estadu nian no jestaun finansas públikas sai mós hanesan oportunidade ida atu inkorpora prátika internasionál sira ne'ebé di'ak liu kona-ba orsamentasaun no transparénsia, bainhira apropriadu ba realidade Timor-Leste nian.

Alterasaun sira ba definisaun ne'ebé klaru kona-ba Setór Públiku no kona-ba Roteiru ba Orsamentu Jerál Estadu nian, ba orsamentasaun husi programa sira, ba programa oioin kona-ba programasaun orsamentál plurianuál no ba alterasaun kalendáriu orsamentál la-hanesan.

Definisaun setór públiku adopta estrutura organizasionál setór públiku nian, no bazeia ba Manuál hosi Fundu Monetáriu Internasionál sobre Manuál Estatística Governu nian kona-ba konta nasional ne'ebé utiliza internasionalmente hosi nasaun sira seluk.

Durante prosesu preparasaun, elaborasaun no diskusaun Proposta LEO, Governu no PN mós halo ona konsultasaun lubun ida ho setór ekonómiku no setór sosiál sira mak hanesan Banku Sentrá Timor-Leste, RAEOA, Seguransa Sosiál, *Câmara de Contas*, Konsellu Konsultivu Fundu Petrolíferu, FONGTIL, La'ó Hamutuk no Fundu Monetáriu Internasionál. Proposta LEO ne'e rasik inklui ona rekomendasaun balun ne'ebé mak hato'o ona sujestaun balun hosi Ekipa tekniku, Fundu Monetáriu Internasionál no refleta mós rekomendasaun sira sita iha Relatóriu *Public Expenditure and Financial Accountability 2018*.

Tuir ajenda ikus PN, sesaun Plenária ba diskusaun no votasaun finál globál ba proposta LEO sei realiza iha fulan-setembru nia rohan, hafoin PN retoma filafali husi resesu.

Proposta Lei Enkuadramentu Orsamentu Jerál Estadu no Jestaun Finanseira Públika hetan aprovasaun iha Jeneralidade iha 6 Julu 2021, no tuir kedas diskusaun no aprovasaun ba Espesialidade iha 13 agostu 2021.

Sesaun Plenária ba Proposta LEO prezide husi Prezidente PN, Sua Exelénsia Aniceto Longuinhos Guterres Lopes, akompaña husi membrus Meza PN. Apresenta no defende husi Ministru Finansas, Rui Augusto Gomes no Vise-Ministra Finansas, Dra. Sara Lobo Brites ho ekipa tékniku MF ne'ebé hanesan proponente ba Proposta Lei refere.